



Rabu, 12 Juni 2024

Ogen : 1 Raja-raja 19:1-9



Ngancam Elia



Adi mejile kedudukan kita i bas sada pemerintahan, erpangkat ras erjabaten kita, banci kin lit kuasanta ngaturken kalak sideban si teruken asangken kita. Tapi adi terjeng ndehara selakak pejabat negara, lit kuasanta? La kin nge bali kita ras rakyat biasa amin kita ndehara kalak si erjabaten?

Bage me Isebel, ndehara Raja Ahap, enggo akapna bali pangkatna bagi perbulangenna. Labo bali ngenca, entah enggom ganjangen pe ia asangken raja e. Teridah tupun raja nuri-nuri man bana kerna perbahanen Elia si enggo munuh kerina nabi-nabi baal, minter merawa atena. E maka ipesehna tenah man Elia, nina: "i bas paksa sigenduari e ka pagi, adi la kam mate kubunuh bagi pemunuhndu kerina nabi-nabi e, ibunuh Dibata gia aku." Arah kata tenahna e teridah maka lit akapna kuasana, entah ganjangen pe akapna kuasana asangken perbulangenna. Lanai iarihkenna man perbulangenna mis ibahanna tindakan, mpeseh berita ancaman man Elia. Tuhu kal Isebel enda ratu, labo terjeng ratu sekalak raja tapi pe ratu man baal-baal. Iberekenna dirina ngelai baal-baal, ras ipajuhna tuhu-tuhu. Penembahen man baal-baal labo ngubahken karakter ku si terulin, labo ka mabai kita ku bas perukuren si lemah lembut. Gelarna pe baal, labo manusia, me labo ietehna ngubahken ukur kalak si jahat jadi mehuli? E maka labo lit perubahen karakter Isebel ku si mehuli. Meganjang rukur, sombong, erelem-elem, e mbelin kal i bas ia. Erkiteken si e labo iukurina ise Elia, mis nge ndarat kata-kata ancaman munuhsa. Adi kita nembah Dibata, kuasa ipenusurNa man banta lako meteh si mehuli ras nadingken si jahat.

Ula salah gunakan jabatan perbulangen